

# REGLUGERÐ

## um veiðar á samningssvæði NAFO 1998.

### I. KAFLI

#### Almenn ákvæði.

##### 1. gr.

Reglugerð þessi tekur til veiða íslenskra skipa á svæði sem nefnt er „samningssvæðið“ í samningi um framtíðarsamvinnu ríkja varðandi fiskveiðar í Norðvestur-Atlantshafi sbr. auglýsingu nr. 17 í C-deild Stjórnartíðinda 29. desember 1978. Vísað er til viðauka III við þann samning um skiptingu þess svæðis í vísindaleg og tölfræðileg undirsvæði (tilgreind með tölustöfum), deilissvæði (hlutar undirsvæðis tilgreindir með tölustaf og stórum bókstaf) og undirdeilissvæði (hlutar deilissvæðis tilgreindir með litlum bókstaf) sem meðfylgjandi mynd í viðauka I sýnir. Veiðar á samningssvæðinu eru óheimilar íslenskum skipum, án sérstaks leyfis Fiskistofu. Skulu þau leyfi bundin þeim skilyrðum sem nauðsynleg eru til að fullnægja skuldbindingum Íslands á grundvelli framangreinds samnings.

### II. KAFLI

#### Rækjuveiðar á Flæmingjagrunni.

##### 2. gr.

Aðeins er Fiskistofu heimilt að veita þeim íslenskum fiskiskipum leyfi til rækjuveiða á deilissvæði 3M (Flæmingjagrunni), sem hafa aflamark í rækju á því svæði.

##### 3. gr.

Á árinu 1998 er íslenskum skipum, sem veiðileyfi fá á deilissvæði 3M, sbr. 2. gr. heimilt að veiða samtals 6.800 lestir af rækju á deilissvæði 3M (Flæmingjagrunni). Af því heildarmagni skal Fiskistofa úthluta hverju skipi aflamarki í rækju á deilissvæði 3M (Flæmingjagrunni) á grundvelli aflahlutdeildar þess í þessum stofni.

##### 4. gr.

Heimilt er að framselja aflahlutdeild og aflamark milli fiskiskipa, samkvæmt þeim reglum, sem almennt gilda um framsal aflahlutdeildar og aflamarks samkvæmt lögum nr. 38/1990, um stjórn fiskveiða með síðari breytingum. Ákvæði 10. gr. laga nr. 38/1990 um stjórn fiskveiða, gilda ekki um aflamark, sem úthlutað er í rækju samkvæmt þessari reglugerð.

Þegar rækja veidd á deilissvæði 3M (Flæmingjagrunni) er reiknuð til þorskígilda skal miðað við verðmæstastuðulinn 1.20.

##### 5. gr.

Skipstjóri skips sem heldur til rækjuveiða á deilissvæði 3M (Flæmingjagrunni) skal tilkynna það Fiskistofu með skeyti eða símbréfi, við upphaf hverrar veiðiferðar. Í tilkynningunni skal koma fram nafn skips og skipaskrárnúmer, nafn eiganda og útgerðaraðila, nafn skipstjóra, að fyrirhugað sé að stunda veiðar á framangreindu veiðisvæði og hvenær áætlað er að veiðar hefjist. Einnig skal skipstjóri tilkynna til Fiskistofu þegar veiðum lýkur og komi í þeirri tilkynningu fram nafn skips og skipaskrárnúmer, nafn skipstjóra, afli um borð og fyrirhugaður löndunarstaður og -tími.

Skyld er útgerð skips að tilkynna til Fiskistofu með að minnsta kosti 24 klukkustunda og í mesta lagi 48 tíma fyrirvara að það fari inn á samningssvæðið. Í tilkynningu skal tilgreina tíma, dagsetningu og staðsetningu skipsins, áætlaða komu þess inn á svæðið svo og afla um borð. Afli skal tilgreindur í hundruðum kílóa miðað við afla upp úr sjó og hann aðgreindur eftir tegundum.

Þegar skip yfirgefur samningssvæðið skal útgerð þess tilkynna Fiskistofu með a.m.k. 24 klukkustunda fyrirvara um slíkt. Skal í tilkynningu tilgreina tíma, dagsetningu og staðsetningu skipsins svo og afla um borð í skipinu sem veiddur hefur verið á samningssvæðinu. Afli skal tilgreindur í hundruðum kílóa miðað við afla upp úr sjó og skal hann aðgreindur eftir tegundum.

Ef afla skips skal umskipað á meðan það erstatt á samningssvæðinu skal útgerð þess tilkynna Fiskistofu með a.m.k. 24 klukkustunda fyrirvara um slíkt. Skal í tilkynningu greina tíma, dagsetningu og staðsetningu skipsins svo og afla þann sem umskipa skal. Afli skal tilgreindur í hundruðum kílóa miðað við afla upp úr sjó og skal hann aðgreindur eftir tegundum.

Þá er útgerð skips skylt að tilkynna áður en skip fer af einu deilissvæði til annars. Þau skip sem búin eru sendingarbúnaði sem veitir Landhelgisgæslu Íslands sjálfvirkt upplýsingar um staðsetningu þeirra eru undanþegin því að senda tilkynningu samkvæmt þessari málsgrein.

#### 6. gr.

Skyllt er þeim er veiða á samningssvæðinu eða hafa stundað veiðar á því að veita aðstoð sína til þess að eftirlitsmenn samningsríkja Norðvestur-Atlantshafs fiskveiðistofnunarinnar, NAFO, sem sýnt geta fram á með skilríkjum að þeir séu til þess bærir, geti komist um borð eftir að skip eða þyrta sem þeir eru um borð í hefur gefið viðeigandi merki á alþjóðlegu merkjamáli um að þeir æski þess að koma um borð.

Um borð í hverju skipi skal vera stigi sem uppfyllir kröfur NAFO og önnur áhöld sem gera eftirlitsmönnum kleift að komast um borð með skjótum og öruggum hætti. Þá skulu í hverju skipi vera teikningar af fiskilestum og mælingar á rúmmáli þeirra, staðfestar af Siglingastofnun Íslands.

Skipstjórum er skylt að veita eftirlitsmönnum endurgjaldslaut alla þá starfsaðstöðu og aðstoð sem þeim er nauðsynleg í starfi sínu, m.a. greiðan aðgang að fjarskiptatækjum, staðsetningartækjum og kortum.

Eftirlitsmönnum skal leyft að skoða og mæla veiðarfæri skipsins og afla til að ganga úr skugga um að farið sé eftir reglum þeim er NAFO hefur sett. Þá skal eftirlitsmönnum gert kleift að skoða skjöl skipsins, skrifa í þau athugasemdir sínar um meint brot og gera skýrslu um skoðunina.

#### 7. gr.

Hverju skipi er óheimilt að stunda veiðar á samningssvæðinu, nema eftirlitsmaður á vegum Fiskistofu sé um borð. Skal útgerð sjá eftirlitsmönnum á vegum Fiskistofu, án endurgjalds, fyrir fæði og aðstöðu meðan þeir eru við eftirlitsstörf um borð. Útgerðir skulu, fyrir þann tíma sem skipið er á deilissvæði 3M, greiða eftirlitskostnað sbr. 7. mgr. 8. gr. laga nr. 151, 26. maí 1996, um fiskveiðar utan lögsögu Íslands.

Útgerð skips skal tilkynna Fiskistofu ósk sína um að veiðieftirlitsmaður verði um borð í skipinu a.m.k. 7 dögum fyrir brottför þess frá Íslandi en a.m.k. 10 dögum fyrir brottför sé um að ræða brottför frá höfn utan Íslands.

#### 8. gr.

Skipstjórar skulu skrá í afladagbækur sem Fiskistofa leggur til, nákvæmar skýrslur um veiðarnar.

#### 9. gr.

Óheimilt er að nota vörpu með minni möskva en 40 mm, mælt með tveggja mm þykkri stiku með 5 kg átaki á þann hátt sem reglur NAFO kveða á um. Þá er óheimilt að hafa um borð slík veiðarfæri án leyfis Fiskistofu.

## 10. gr.

Skylt er að nota seiðaskilju við veiðarnar og má bil milli rimla ekki vera meira en 22 mm.

## 11. gr.

Ef samanlagður aukaafli allra tegunda sem eru undir stjórn stofnunarinnar (NAFO) verður meiri en 5% af þunga í hali er skylt að yfirgefa veiðistað. Ekki er heimilt að hefja veiðar innan 5 sjómílna frá þeim stað.

### III. KAFLI

#### Ýmis ákvæði.

## 12. gr.

Þrátt fyrir ákvæði 2. gr. er sjávarútvegsráðuneytinu heimilt að veita leyfi til rækjuveiða á deilivæðum 3L, 3N og 3O ef um er að ræða skip sem tekur þátt í rannsóknum sem veiðar eru nauðsynlegur þáttur í.

## 13. gr.

Brot á reglugerð þessari og ákvæðum leyfisbréfa gefnum út á grundvelli hennar, skulu varða viðurlögum samkvæmt III. kafla laga nr. 151, 27. desember 1996, um fiskveiðar utan lögsögu Íslands.

## 14. gr.

Reglugerð þessi er sett samkvæmt lögum nr. 151, 27. desember 1996, um fiskveiðar utan lögsögu Íslands til þess að öðlast þegar gildi og koma til framkvæmda 1. janúar 1998. Jafnframt falla úr gildi reglugerð nr. 676, 28. desember 1995, um veiðar íslenskra skipa utan fiskveiðilandhelgi Íslands og reglugerð nr. 685, 28. desember 1996, um úthlutun veiðiheimilda á Flæmingjagrunni.

*Sjávarútvegsráðuneytinu, 16. desember 1997.*

**Þorsteinn Pálsson.**

Árni Kolbeinsson.

VIÐAUKI

